

SAMÞYKKT

um búfjárhald í Stokkseyrarhreppi.

I. KAFLI

Almenn ákvæði.

1. gr.

Samþykkt þessi er sett til að stemma stigu við óhóflegu^abúfjárhaldi innan þéttbýlismarkna á Stokkseyri, svo og til að tryggja hæfilega nýtingu á gróðurlendi í eigu sveitarsjóðs Stokkseyrarhrepps.

2. gr.

Búfjárhald (alifugla, geita, hrossa, kanína, loðdýra, nautgripa, sauðfjár og svína) er óheimilt í Stokkseyrarhreppi, öðrum en þeim sem á lögbýlum búa, nema með sérstöku leyfi hreppsnefndar.

3. gr.

Sá sem hyggst sækja um leyfi samkvæmt 2. gr. skal senda um það umsókn til hreppsnefndar. Í umsókninni skal gera grein fyrir fjölda búfjár, sem óskað er leyfis fyrir, hvernig geymslu skuli háttað og öðru er máli kann að skipta.

4. gr.

Nú telur hreppsnefnd að skilyrði til búfjárhalds sé fyrir hendi og getur hún þá veitt leyfi sem bundið er við tiltekinn hámarksfjölda. Veitt leyfi til búfjárhalds skuldbindur þó ekki sveitarsjóð Stokkseyrarhrepps til að sjá leyfishöfum fyrir beitilandi handa búfé né veita þeim aðra aðstöðu til búfjárhalds. Leyfið er veitt til óákveðins tíma en er uppsegjanlegt með eins árs fyrirvara miðað við 1. júní ár hvert.

Leyfið er háð gildandi reglum, það er gefið út á nafn og er ekki framseljanlegt. Sá sem fær leyfi til búfjárhalds skal hafa búféð í öruggri vörslu og ber hann að öllu leyti ábyrgð á því.

5. gr.

Ef leyfishafi brýtur samþykkt þessa má afturkalla leyfið og er þá heimilt að taka búféð úr vörslu eiganda og selja það á opinberu uppboði eða slátra því. Þannig má og fara með búfé sem ekki hefur verið fengið leyfi fyrir.

6. gr.

Leyfishafi ber einn ábyrgð á því að hann hafi beitiland handa búfé sínu á sumrum og fóður að vetri og allri meðferð búfjárins. Ef búfjäreigandi vill láta búpening ganga úti að vetri eða beita búfé, skal það því aðeins heimilt að búfé sé í öruggri vörslu og hafi viðunandi skjól.

Um fjallskil búfjár innan þéttbýlismarkna á Stokkseyri fer eftir fjallskilareglugerð nr. 380/1975 fyrir hreppana milli Þjórsár og Hvítár (Ölfusár) og þeirra jarða í Biskupstungnahreppi sem liggja sunnan Hvítár í Árnassýslu.

II. KAFLI

Um hagnýtingu gróðurlendis í eigu sveitarsjóðs Stokkseyrarhrepps.

7. gr.

Þeir búfjäreigendur sem hafa leyfi til búfjárhalds samkvæmt samþykkt þessari, bændur sem búa á lögbýlum svo og aðrir landeigendur, sem lögheimili eiga í Stokkseyrarhreppi, geta fengið leyfi hjá sveitarstjórn um beitarrétt á gróðurlendinu, „Stokkseyrarmýrinni“, fyrir ákveðinn fjölda gripa, sem nánar er tilgreindur í hverju tilviki. Gróðurlendið, „Stokkseyrarmýrin“, er afgirt á kostnað sveitarsjóðs.

8. gr.

Ráðinn skal sérstakur gæslu- og umsjónarmaður með gróðurlendinu, en eigendur búfjár sjá um smölun að fyrirsögn hans.

Búfjárefirlitsmaður Stokkseyrarhrepps annast eftirlit með búfjárhaldi og gróðurlendi Stokkseyrarhrepps.

9. gr.

Nú fjölgar búfé leyfishafa samkvæmt samþykkt þessari svo mikið að gróðurlendinu er talin hætta búin og/eða beit gerist ófullnægjandi, og getur hreppsnefnd þá ákveðið að takmarka fjölda gripa sem hver leyfishafi má hafa á gróðurlendinu.

III. KAFLI

Ýmis ákvæði.

10. gr.

Lausaganga búfjár er óheimil innan þéttbýlismarkna Stokkseyrar. Starfsmenn sveitarsjóðs skulu handsama og taka í vörslu allt búfé sem gengur laust í kauptúninu. Enn fremur geta þeir, sem fyrir ágangi verða, látið handsama ágangsfénað, sem þeir skulu tilkynna búfjárefirlitsmanni um tafarlaust.

Eigendum slíks fénaðar ber að greiða allan kostnað af handsömun þessari, fóður og annan kostnað sem af slíku leiðir, og má láta selja búfénaðinn á uppboði til lúkningar kostnaðinum verði fénaðurinn ekki leystur út innan sólarhrings frá því eigandinn fékk vitneskju um handsömunina eða, ef eigi er vitað um eiganda, innan hæfilegs tíma eftir að auglýsing um búfénaðinn hefur verið birt. Einnig skal eigandi slíks búfjár bæta það tjón er búfé hans hefur valdið. Ef um ítrekað brot er að ræða á lausagöngu búfjár varðar það sektum og leyfissviptingu.

11. gr.

Brot gegn samþykkt þessari varða sektum. Með mál út af brotum skal farið að hætti opinberra mála.

Samþykkt þessi sem samin er og samþykkt af hreppsnefnd Stokkseyrarhrepps, staðfestist hér með samkvæmt lögum um búfjárhald nr. 46 25. mars 1991 til þess að öðlast gildi þegar í stað og birtist til eftirbreytni öllum þeim sem hlut eiga að máli.

Ákvæði til bráðabirgða.

Allir þeir sem við gildistöku samþykktar þessarar eiga eða hafa í umsjá sinni búfé sem fellur undir samþykktina, skulu innan sex mánaða frá gildistöku hennar hafa tilkynnt um búfjárhald sitt og sótt um leyfi, ella fellur niður heimild þeirra til búfjárhalds.

Landbúnaðarráðuneytið, 18. nóvember 1993.

Halldór Blöndal.

Jón Höskuldsson.